




3/000









LES
REVOLUTIONS
DV MONDE,

Avec

LES PROPHEITIES
POVR LES ANNEES

1615. & 1616.

Selon que les plus Doctes on predict.

Par l'Hermite solitaire.



A PARIS,

Par RENE' GIFFART Imprimeur,
demeurant ruë grande Bretonnerie,
prés la porte saint Jacques.

M. DC. XV.

38

Cass

F

39

THE NEWSPAPER
LIBRARY

1326

1615 rev.

57-1477



PROPHETIES.

A Bel Quené Doyen de Therouene viuant en l'an
1477. a dit,

*L'an mil six cens & seize
Mettra tout le monde en malaise,
L'Aigle son vol abbaissera,
Et l'Ange de l'Isle haussera.*


Lyberaty ayant soustenu à la Ligue en l'an 1590. que
le Roy de Nauarre estoit vray & legitime Roy de Fran-
ce, & qu'apres sa mort elle le regretteroit & pleurerait
comme son pere & liberateur, fut condamné à la mort
pour cela en la ville de Paris, auant l'execution dit tout
haut,

*Mil six cens quinze & six cens seize
Recommenceront les trauaux
Pour les disputes de la Chaize,
Et pretentions des Crapaux.*

Le grand Cesar ayant dit à vne des grandes de Fran-
ce beaucoup de choses estrâges à aduenir iusqu'en 1611.
elle festonnant, adiousta

*Quinze le veut, mais seize non,
Ils sont en pique par puissance,
Chacun accroit sa meffiance,
Et met tout en confusion.*

Or obeyffons aux puiffances legitimes & superieures,
prions Dieu pour la concorde des Princes Chrestiens,
& nous dominerons les aftres, & éuiterons les maux
des Propheties. Amen.



DISCOVRS

DES GENERAVX

changements de l'Vniuers.



A decadence des Royaumes, & captiuité des Nations, de mesme que la fondation des Empires, n'aduient point par vne rencontre aueugle des choses fortuites. Ces grandes & notables mutations ne se font point par l'incertain euenemēt de l'hazart. l'Air d'Anaximenes n'a point esté la cause de la forme des Monarchies, encore moins les Atomes d'Epicure, proportions ou nombres Pythagoriques. C'est la main seule du DIEV tout-puissant qui les establit, & la bonté de sa Prouidence eternelle, qui l'imite l'accomplissement de leur temps, de leur duree & subsistence. Car comme toute puissance & domination vient de luy: aussi toute leur vigueur & force decoule de la douceur de la benignité de sa grace. Ainsi ceste tant triomphante & glorieuse Nation des Iuifs, mesme autrefois la bien-aymée de DIEV, (exemple bien remarquable) monta premierement à la summité d'une grandeur de Regne Auguste & redoutable, & puis apres feust miserablement enchainée & emmanotée selon le temps de son opressiō determinée.

Ainsi par 70. semaines d'ans déterminées, la Captiuité Babilonique les chastia, Actes Chap. 7. Ainsi depuis la restauration du Temple iusqu'à la venuë du CHRIST le Redempteur, se deuoient escouler sept semaines & soixante deux semaines d'ans, & après soixante deux semaines, (auquel temps Daniel Chap. 9. dit, les desolations de ce peuple deuoit estre parfaites & accomplies) la malheureuse nation deuoit estre destruite & desolée pour estre d'oresnauant la balieure du Monde, & le mespris de toutes nations. Les Royaumes donc ont de DIEU leur establissemēt & leur fin, & par consequent s'esleuent, subsistent, & dominant selon l'abondance de sa faueur, non selon nostre prudence, valeur & force. Et seroit-il aussi raisonnable, que des si generaux & vniuersels changemens, des effets si notables & redoutables dependissent de la foiblesse & imbecillité de l'homme? De l'homme, qui comme la fleur marcist avec le declin de son iour, qui comme l'ombre verse du soir, s'aperisse, iusqu'à la nuit, iusqu'à la fin de sa vie, & comme la bulle volante s'esuanouit à nos yeux avec les Idees des nuages de l'air, dont la force s'esgale à la durée des torrens, qui s'abaissent & s'escoulent en leur vie, en leur voye, en leur soudaine & fuyante course? Non celà ne se peut. C'est aussi DIEU seul qui les a preordonnez & ordonnez, deuers lequel aussi seulement (comme les Saints Patriarches, Ioseph, Daniel, & saint Iean) doiuent recourir ceux qui veulent sçauoir le futeur de leur vigueur, & de leur cheute, puisque; *Apud illum*, comme dit saint Augustin en ses Soliloques, *omnium stabilitum stant causa, om-*

nium immutabilium manent origines, omnium rationabilium, irrationabilium atque temporalium vinntrationes. Que si DIEU ne nous reuele immediatement ces diuins secrets (comme à ces bien-reux Patriarches & Peres) on peut comme moy les rechercher dans ses supremes liures, dans les Cieux estoilleez, ses Hieroglyphiques admirables, & les grands registres de ses Saints decretz. Decrets qui nous doiuent estre dautant plus considerables, que nous pouuons appeler d'iceux par prieres deuant le Throsne de l'Eternel, puis qu'ils ne necessitent point, n'obligent point, & n'emportent que nostre libre & voletante affection par inclination naturelle. Donc comme sa diuine bonté a laissé à l'homme le franc-arbitre aux choses petites, communes & ordinaires, au vice & à la vertu tout de mesme, luy à elle osté l'entier gouuernement des choses plus grandes, plus hautes & vniuerselles. Et partant les Empires des peuples & des Nations, ne depēdent pas de la vaillance où sagesse, (encore que DIEU s'en serue,) mais de son seul ordre admirable & diuin, selon lequel le Ciel, les Astres, la Terre & toute la Nature se meut & se gouerne. Car c'est luy qui *Librat in pondere montes & colles, & in statera molem terra tribus digitis appendit.* C'est luy quia pesé les montaignes & les valees, & sur ses trois doigts en sa balance suspend ceste grande masse terrestre, la tourne boullant pour seruir où Regner selon son bon & iuste plaisir. Je faisois ce Discours en moy-mesme, quand ie vins à benir & admirer la grande grace de DIEU enuers nous FRANÇOIS, de ce qu'il a laissé passer franche ceste Monarchie audelà des

4

ans Climacteriques des Royaumes, & la conseruée
sientiere, avec tant de gloire & de splendeur, qu'elle
a offusqué l'ornement des Empires, & l'apparat
releué de toutes autres Royautez. Mais comme ie
vins à remarquer par quel moyen la Diuine Ma-
jesté l'auoit maintenuë en la pompe de sa genereu-
se magnificence, par quel ordre elle l'auoit formée
& affermie, par l'espace de tant de siècles diuers,
par quels instrumens elle vouloit encore esleuer
iustqu'au Ciel, iustqu'à la consommation des siècles,
les ailes de sa gloire triomphante, en luy faisant
fonder vn Empire sans borne & sans fin, plus im-
petueux que le Grec, plus solide que le Romain, &
plus fort & iuste qu'aucun autre, ce feust lors que
ie demeuray comme rai, & que la compren-
sion des voluptez de ces belles curiositez me fist
desirer d'en faire part à mes amys, Curiositez dau-
tant plus desirables, qu'elles sont en toute façon
pures, n'ayans besoin que d'vn clair iugement
pour les comprendre, & d'vne ame toute nette &
munde pour auoir le desir en mesprisant ceste
Doüie terrestre d'aller admirer leur diuin facteur &
conseruateur. Aussi pour se les bien figurer, il faut
passer audelà de ce bas Monde, esleuer son ame
hors des borbiers des Elemens, & conduisant son
esprit iustqu'à la consideration du Throsne de
DIEU, des Cieux & des corps celestes les mediter
sagement. Mais dira quelqu'vn, n'est-ce pas trop
haut voler? n'est-ce pas trop entreprendre que de
lire & apprendre les secrets de la Diuine Majesté?
Non (belle ame) non, car sa misericorde infinie
les nous laisse voir pour nous faire voir sa puissance
& clemence, pour attirer nos ames à luy, & rece-

voir les effects de nostre humble repentence. D'autant que les Anges & intelligences de ces grands Orbes celestes, dans lesquels nous lisons ces beaux secrets ; tout ainsi qu'elles sont les Herauts de sa haute Iustice, par mesme raison au mouuement de leurs Concentriques & Eccentriques, nous annoncent elles la rigueur de la seuerité de ses futures vengeance, & dans iceux *tanquam in albo Pratoris*, nous y font lire les Edits comminatoires de nostre prochain chastiment. Et à vray dire, le Ciel, & la Terre ne sont autre chose que les liures de la Diuinité, dans lesquels elle nous laisse lire (bien que plus obscurément en l'un qu'en l'autre) les ordonnances de sa benignité incroyable, & les aduertissemens de la iuste punition que nous auons meritée, par l'un nous rendons graces de sa grande misericorde, par l'autre nous nous repentons, satisfaisons & l'adoucissons. Ainsi le Ciel avec des lettres de feu, avec des escriptures mouuantes & Caracteres estincellans, nous monstre engrauez les signes certains du courroux diuin : Ainsi la Terre & la Nature par la difformité de l'horreur de ses monstres, par le mugissant son des secousses de son tremblement, par la desolation de ses deluges & sterilitez, nous faict comprendre & apprendre les menaces de l'execution de son ire espouuentable, lecture alors bien generale, mais aussi bien à craindre, & qu'on ne doit pas mespriser. En ceste façon tout l'Vniuers peut estre appelé le liure de la Diuinité, où le mortel sans offence avec la gloire de DIEU à pouuoir d'apprendre à s'amender. Mais le Ciel comme plus digne & plus pur, comme d'un ordre plus

beau, plus parfait & intelligible, comme composé de matiere incorruptible & ineffaceable, doit estreappelé l'vng des plus beaux liures de ses plus grands secrets, & le plus rehaussé Tableau de son eternelle preuoyance. Liure d'autant plus admirable qu'il a moins de lettres & de feuillers, & neantmoins designe, represente, & signifie, non seulement vniuersellement & generalement toutes les choses generales & vniuerselles, mais encore demontre aussi les principaux & plus notables accidens de nos fortunes particulieres. Doncques DIEV avec les Caracteres des sept Planettes & petits poincts des Estoilles fixes, par leur distance & conionction, par leurs feux & mouuemens, à escrit dans les Cieux les menaces de la determination de sa iustice, & par mesme moyen reglant par ordre les generaux changemens des Empires, leur a establi vng terme, vng periode, vne fin & vne borne certaine en leur stabilité!

Or ces periodes déplorables, ces mouuemens menaceans, desolees desolations des peuples, sont recogneuz par plusieurs considerations, les plus claires & probables desquelles sont quatre, sçauoir le changement des Absides des Planettes, (lequel regarde plustost le particulier des Royaumes que le general du Monde, comme les autres trois ont leur plus grande signification sur la plus grande partie de l'Vniuers) La seconde se prent de la mutation de l'Eccentricité du Soleil, La troisieme de la diuerse figure de l'obliquité du Zodiaque, & la derniere de la grande coionction que font ensemble d'vne triplicité en l'autre, les superieures Planettes, Saturne & Iupiter apres s'estre entresuiuis

dans les Cieux l'espace de huit cens ans ou environ. Car les Cometes, & toutes autres apparitions metheoriques, sont plustost des tesmoignages des susdits mouuemens celestes, ou comme les Ecclipses des aydes & nouuelles forces aux generales influences, qu'aucune cause certaine d'aucun notable & general changement. Ce sera (amy Lecteur.) de ces quatre mouuemens celestes (principalement de ceux de l'Abside de Iupiter, qui entraîne avec soy celuy de Mercure) appliquez aux mouuemens de ce Royaume, desquels comme d'une loüable curiosité ie desire de t'entretenir sobrement & modestement. Et parce que l'application de ces Absides est vn sujet espineux, & qu'aucun autre n'a voulu encore esbaucher, Soyéz moy donc fauorables Diuines & chastes Muses, *Vos mihi sacrarum penetrabilia pandite rerum, & vestri secreta poli.* Enseignez moy le secret de vos Cieux estoillez, guidez moy benignement par les deserts de ces vastes solitudes, & puis que le benin Lecteur ne peut esperer de moy, *Atticos sales, aut fluentes numeros*, mais à bien grande peine, *planam & nudam orationem*, Ornez moy de vostre gracieux Ceste, *In quo*, dit Hesiode, *Gratia, benivolentia, & probabiles suasiones.*

Or pour venir au point, Il faut sçauoir, que quand nous parlons des Absides, nous entendons des Absides des Eccentriques, qui sont ainsi appelez, parce qu'ils n'ont pas leur centre avec celuy du Monde, & partant, accedent, & sont plus proches du centre du Monde par vn costé, que par l'autre. Comme si la ligne diametrale dudit Eccentric, passant par son propre centre & celuy du

Monde, distinguoit en la circonference de l'Eccentric deux poincts, le plus lointain du centre du Monde seroit appelé, l'Abside, l'Auge, l'Apogée del'Eccentric, l'elevation du Planete, autrement a plus longue longitude, & le plus haut poinct de l'aligne del'Auge du Planete; L'autre poinct qui est le restant de la ligne diamétrale, s'appelleroit le Perigée, l'oposition de l'Auge, & la plus briefue longitude. Or yng Planete en ce point de l'Abside, est estimé plus agissant, plus pur, plus fort & plus heureux qu'ailleurs; parce qu'il est plus proche des figures celestes & des Estoilles fixes, desquelles accidentairement il prent sa propriété & vertu, & tout agent naturel agit plus validement que plus il est proche de ce qui luy imprime passion.

Il y a plus, c'est que ce mouuement est comme la fin de tous les mouuemens celestes, dans lequel y a mouuemens de centres, qui sont de si grande consequence; car le premier mobile, meut le second, celuy là les deux Orbes difformes, les deux orbes difformes, tournent tout l'Eccentric, & par mesme moyen le poinct du Perigée & de l'Abside; De là en suite, selon la diuersité des centres, des Signes, & des Asterismes, les influences agissent. Il est donc nécessaire que ce mouuement ait vne grande vertu. De ces mouuemens voicy le Scheme.



Aussi le Reuerendissime Cardinal de Alliaco liure 3. de Orbes, Cardā 5. aph. 129. & tāt de doctes ont remarqué, que le seul Abside du Soleil, ayant marché depuis Aries iusqu'à Cancer, laissa inhabitable la partie Australe, c'est à dire, au commencement du Monde fist plustost habiter l'Australe que la Boreale, qu'après de Cancer iusqu'en Libra, il fist habiter l'Australe & Boreale, mais la Bo-

A. Centre du
B. Centre de
C. C'est l'A
D. le Perigee
E. Monner
centre de l'ec

reale receut plus de ses vertuz, commende & commandera, que passant de Libra en Capricorne, rendra plus habitee l'Australe, non qu'elle domine la Boreale, Dont ils ont en fin conclud, que de Capricorne iusqu'en Aries (Sitant est que le Monde dure tant, que l'Abside Solaire puisse faire ce cours) l'Australe dominera, & la Boreale sera nuë, destruite & desolée.

Ie suiuirois ce discours de l'Abside du Soleil & de toutes les autres errantes, montrant en quels Signes ils sont paruenuz, & quelles Nations & peuples peuuent souffrir où vaincre, mais ce seroit estre trop liberal des secrets Kabalistiques, & puis i'excéderois en vn grand volume contre mon intention, nous nous contenterons donc de suiure seulement le chemin qui nous conduit en la France.

Le changement des Absides de toutes les Planetes, ne touche pas à icelle, il n'y a que celuy du courtois & genereux Iupiter que nous deuions obseruer, parce que Iupiter seul, principalement (comme il est remarqué par tous, notamment par le tres-docte Cardinal de Cambray) est significateur de la France, son Algebutar, son Chronocrateur, & Almuten, c'est à dire, le Planete qui y a plus de domination. Il nous faut aussi remarquer que le Tropique de Cancer sur tous les Signes celestes, a speciale puissance & signification sur elle. Cancer (dis-je) ce beau signe Royal, ainsi appelé en terme de l'art, parce qu'aux Natiuitez des grands Roys, il occupe toujours le principal lieu de la figure, Principalement en France, tesmoings en soient tant d'heureux & valeureux Roys; & entre autres les

inuincibles & redoutables, HENRY le grand &
 LOYS 13. son fils aujourd'huy heureusement re-
 gnant, dont le premier pour auoir eu ce tres-fort
 signe en la maison Royale, c'est à dire, au poinct de
 son Midy, dans lequel signe estoit placée la partie
 de fortune (à conter de la Lune au Soleil,) laquel-
 le estoit illustrée du trigone dextre de Venus, da-
 me de la maison huitiesme, attribuée à signifier
 les heritages, & du triangle fenestre de Saturne,
 seigneur de la quatriesme, qui designe le patrimoi-
 ne des ayeux, par ces constellations tres-heureu-
 ses, encores que ceste partie de fortune eust pour
 ennemis le Soleil Mars & Mercure, & ce par tre-
 sennemie opposition, & la Lune & Iupiter par
 quadrat dextre & fenestre, qui representoient des
 Papes, des Roys, des grands Capitaines, des gens
 de lettres, des peuples & Religieux tres-opinia-
 tres, Si est-ce que par la volonté de DIEU, (qui a
 voulu laisser agir les causes secondes & naturelles)
 c'est à dire ce Signe & ces trigones, il a succédé aux
 droits paternels & maternels, & pour raison de ce
 qui est designé par le Cancer; c'est à dire, la France,
 est demeuré maistre absolu, vainqueur & triom-
 phant tres-heureux. Quant au Roy Regnant la
 Gloire des Princes Chrestiens, la Cōsolation de la
 France, & l'Esperance de l'Vniuers, qui pourroit
 desirer d'auoir mieux placé ce Signe? veu que sa
 Majesté l'a pour ascendant & horoscopant en sa
 Natiuité, presage, marque, indice & tesmoignage
 tres-certain & tres-indubitable, entre tous les au-
 tres, qu'elle est naturellement née pour l'honneur
 de son Royaume, pour son bien & repos, & que
 de son viuant (& plaise au Createur qu'elle viue

plusieurs siecles) aucune puissance estrangere où
 subiecte, ne peut broüiller en iceluy sans dur re-
 pentir. Mais pour nous radresser au sentier que
 nous auions vn peu escarté.

C'est donc Cancer qui darde sur la France ses
 fauorables influences, & comme il est solstitial, re-
 glant le cours & descente du grand flambeau du
 jour, il est aussi l'exaltation de Iupiter, qui en ter-
 me de l'art, est la grande fortune du Monde, qui
 ne signifie que Seigneuries, Honneur, Magnani-
 mité, Iustice, Gloire & Magnificence; Aussi ce
 Royaume qu'il represente, est en hōneur, dignité,
 force, vaillance, & gloire, le premier, le plus digne,
 & le plus desirable de tous ceux que le clair Soleil
 illumine. C'est pourquoy physicalement il confere
 aux vrais François vne generosité & magnanimité
 incroyable, vne douceur & courtoisie tres-ciuile,
 vn courage & hardiesse sans pair, vne desmesuree
 inclination à exercer la Iustice, la pieté & deuotiō,
 avec vne probité, honnesteté, pompe & netteté
 inexprimable, qui sont les qualitez essentielles de
 la nature de Iupiter. Car quant au desir de sçauoir
 les nouveautez, promptitude & impatience, & en-
 core au changement des nouveaux habits, elles
 viennent de la participation que la Lune a en ce
 Signe, auquel selon nos regles, elle a dignité de
 maison, laquelle *Eundo, & redeundo perpetuo noua*
renouet & affert, studiumque sciendi ingerit, ut &
propter mutationes formae suae, formas mutare facit
vestimentorum. Lesquelles inclinations naturelles
 viennent parfaictement toutes les fois que quel-
 que François a en sa Natiuité heureusement con-
 joints & posez Iupiter & la Lune au Cancer, ainsi

que j'ay remarqué plusieurs fois, comme de mesme selon leur infaute & contraire position, ces inclinations se treuvent manques, impropotionnees, & excedantes.

La France est encore aussi subiecte aux beaux gemeaux Castor & Polux, parce que ce Signe est l'antisce de Cancer, sa reflexion & illumination, & qu'avec ledit Cancer, il est esgalement vertical & proche de la France. Car le blond Phœbus n'a uoisine iamais plus pres de nous que quand il parcourt ces Signes radieux. C'est pourquoy nous deuons aussi considerer les puissances de Mercure leur seigneur, qui à cause de celà, peut autant où plus en ce Royaume qu'en aucun autre du Monde, tesmoin le bel ordre establi dès la fondation de l'Estat par les loix Saliques, & tant de Chapitres, Constitutions, Pragmatiques Sanctions, Loix, & Ordonnances esrites & Mercuriales que nous auons, qu'il semble que n'y puissions rien plus adjouter. Tesmoin les procez immortels que la vertu Mercuriale suscite & renouuelle si opiniastrément qu'on en est en prouerbe à toutes Nations. Car la subtilité causeuse Mercuriale ioincte à la nature esgale & debonnaire de Iupiter, ne peuuent que donner des plaids & des procès. Notamment que l'Abside de Mercure est encore dans le Scorpion signe Martial & liugieux, duquel il sortira en l'An mil six cens quinze sequente année, & deslors la monstreuse Chicane peu à peu commencera à s'alentir iusqu'au temps de la gloire de l'Empire François, par laquelle elle sera quasi entierement abrogee. Ceste Monarchie sera donc encore sous ces loix & ordre establie, & gouuernée par trois

censans ou enuiron, auquel temps l'Abside de Mercure que Iupiter gouuerne avec le sien (Car Mercure luy a donné toute sa puissance, la laissant toujours au Planete qui le ioint, & Iupiter luy est en conionction) auquel temps (dis-je) le dit Abside se iointra au rutilant, ardent & enflammé Antares, estoille des plus puissantes du Ciel, Beibenie des plus heureuses, comme a dit Hermes Trismegiste, de Nature Iouiale & Martiale. Alors les valeureux Roys François se formans des immortels trophées, des Couronnes & sceptres des Empires & Royautez serues & vaincuës, receurent des tiltres de gloire & Majesté non encore exprimez, & la subtilité Mercuriale conuersiue, s'estant toute transformée en Iouiale & Martiale, ornera plustost la main François d'un Cymeterre bien acéré, que d'un vil sac de molle toille qu'aujourd'huy il farcist tout de complainctes & criees des miserables Lirigeans. Et par mesme moyen se treuuant vainqueur de tant de genereux peuples, estimera indigne de la gloire de son courage, de s'amuser aux reliques & desbris d'un cherif heritage, luy qui viendra de conquerir tant de Terres & de Mers. Cependant si par prudence humaine (Considere, amy Lecteur ceste parolle qui laisse le recours enuers DIEU tout entier) nous voulons dominer les Astres, & debilter la malignité des cruelles influēces, qu'entre cy & ce temps l'inambulation de nos Absides pourroit rencontrer, il est necessaire que nos Roys gardent bien les solemnitez & ordre ancien du Royaume; fuyans toute mal-heureuse nouveauté, & par mesme moyen cōseruent le rang aux Princes du sang, qui sont les immuables fonde-

mens de l'Estat, & par mesme suite, maintiennent les Cours de Parlemens, (principalement celle de Paris, seante à la Capitale) en la puissance & autorité qui leur a esté donnee en leur establissement : Car il faut que leur Majesté sçache, qu'elle leur a baillé vne portion de leur pouuoir sous telle constellation, qu'on ne la leur sçauroit oster, esbranler, où esbranler qu'avec la des-vnion Mercuriale & Iouiale qui cimente & establissent humainement leur Royauté. Qu'il plaise donc à leur sacrée Majesté, de ne forcer ce pourpre Royal, ces mortiers antiques & venerables, qui sont enuers les destins François des presages de si heureux Augures, & pour le soubstien de leurs redoutez sceptres, autant d'armées puissantes, voire autant de celebres victoires. Que leur Majesté laisse donc faire librement leur fonction à ces Augustes Senats, sans les contraindre à l'approbation des nouveaux Edits par leur puissance Royale, & moins encore les desplacent (non pas mesme par vn peu de temps) de leur antien Palais où ils sont déjà stablement fondez. Car estans en partie les arcs-boutans, piliers & colonnes de leur Estat, comme le montrent les principes d'iceluy, leur Couronne & Estat ne peut estre esbranlé, ou receuoir vne mauuaise secousse eux demeurans debout, & dominans de leur part aux Palais de leur Regne. Si ie voulois monstrier le mal-heur de ce chagement, ie vous ferois souuenir des toujours déplorablest répas des HENRY le grand, HENRY 3. HENRY 2. &c. de tres-heureuse memoire, auquel temps le Parlement des Pairs estoit déplacé & mis ailleurs. Mais parce que chacun sçait ce changement, &

que la consequence dépend des principes qui ne se preuent point, Je me contenteray de la supposer. Non que l'ordre nouueau, où ledict Palais, ou le changement de la demeure d'iceluy, cause ces cruels accidens, mais seulement ce changement est vne propre disposition qu'on baille en ayde aux malignes influences qui n'agissent iamais sans le moyen de l'ayde des choses inferieures, où bien encore sont vn tesmoignage & aduertissement du malin & infaute mouuement celeste superior, auquel la chose inferieure acquiesce & correspond, à laquelle plustost par nostre prudēce, elle deuroit contrarier. Et voyla la vraye cause naturelle & phisicale de ces grandes causes, qui decoulantes de la main de l'Eternel, doiuent estre considerees pour nostre bien, bride en main, sagement & discrettement en admiration & consolation. Ces principes posez, disons maintenant.

Que quand la parolle efficiente de l'immortel, desbroüillant les matieres confuses du Cahos, estendit dessus les Airs, ces bleuës courtines celestes que nous appelons Cieux, chacune d'icelles prenans leur bransle selon la volonté du souverain Architecte, vers l'Orient ou l'Occident, selon leurs diuers cercles & Orbes, en course, viste, où tardifue; Alors Iupiter, (que nous deuons seul particulièrement contempler) se trouua auoir son Abside, comme en son propre & special lieu, vers la fin du signe Cancer, en l'Estoille appelee la poitrine d'iceluy. Je dis alors contant depuis ce premier commencement du Monde, iusqu'à ce temps, (selon le calcul des Grecs qui commencent l'An en Septembre,) conforme au conte

Astrono-

Astronomique) 7124. ans. Mais parce que c'estoit l'enfance du Monde & l'eâge d'or, & qu'après cōme le desir de la domination esmouuoit les ames ambitieuses, le general Kataclisme submergea toute nature humaine, reseruee celle de l'Arche, nous ne dirons autre chose du premier mouuement de nos Absides, sinon qu'alors mesme du general & vniuersel deluge qui feust l'an du Monde 1700. où enuiron selon ledit conte, (ô tres-profōde mer de meditation qui engloutis la pensee de tous hommes, de mesme que tous hommes, ô abisme de cogitation à nostre cogitatiō, ô gouffre sans aucun fonds de la grande prouidence & bonté de DIEU,) L'Abside se ioignoit au 13. degré du Lyon, avec les luisantes estoilles du Nauire Argos, qui demonstroit par ce rencontre vn deluge futur: Car il auoit esté dès le commencement du monde la menace d'un deluge sur les meschans, & la promesse d'un Nauire de sauueté pour ceux qui craindroient DIEU, & qui d'un discours muet aduertissoit lors Noé & sa posterité qui habitoit les Gaules, d'en faire vn semblable pour s'y sauuer. Type vraiment diuin, escriture & figure certes toute sainte, que les hommes peuuent bien admirer, non tous bien cognoistre, en taster le bord & le superfice, non profōder iusqu'au centre de sa demonstration: Car les Cabalistes tiennent qu'il demonstre encore l'Eglise. La Terre du depuis apres plusieurs longs & multipliez Siecles, s'estant repeuplée enuiron l'an du Monde 2400. l'Abside estant paruenue au 20. degré du Lyon, avec l'ayde de la grande estoille appelée le Roirelet, où cœu du Lyon; de nature plus martiale que Iouiale, plu-

fleurs Roytelets en chasque Prouince & Ville,
 s'esleuerent en nos Gaules, qui regnerent en icel-
 le avec diuers succez, mal-heurs & guerres, ainsi
 qu'on le peut probablement juger par le mouue-
 ment de ces Absides, quand quatre cens ans apres,
 an du Monde 2800. où enuiron, l'Abside rencon-
 tra la derniere estoille de la cuisse du Lyon de la
 nature de Saturne, de Venus & Mercure, qui de-
 monstre des guerres infortunees & intestines en-
 tre les parens, comme de mesme encore apres,
 quand l'Abside s'auoyfina de la derniere du pied
 dextre de la grande Ourse de nature Martiale: Les
 Gaules furent donc en cest estat iusqu'à la venue
 de Cesar, enuoyant ce pendant diuerses peuplades
 d'un costé d'autre, telles que celles de ces gene-
 reux guerriers qui ayans debellé & rauagé tant de
 Royaumes qu'il y a pour passer de la Gaule en
 Thrace, se firent appeler Gaulo-Grecs, où comme
 ceux qui descendans en Italie, vainquirent les Ro-
 mains, saccagerent Rome & assiegerent le Capi-
 tole. En ceste façon, selon le rencontre des fortes
 constellations, les Gaulois firent redouter les ge-
 nereuses armes de leur vaillance, & flotter glo-
 rieusement leurs vainqueurs estendars par tout
 ce grand Vniuers, la memoire de la pluspart des-
 quels beaux faicts a esté engloutie par la voracité
 du temps, & couuerte pour iamais de sa rouille
 oublieuse. C'est pourquoy nous franchirons li-
 brement le reste du temps que l'Abside a demeuré
 dans le Lyon & entrerons en la Vierge. Vierge,
 mal-heureuse Vierge, Signe fatal & de mauuais
 rencontre aux Gaulois: Car par nos principes, ce
 Signe est seruile & s'appelle le détrimet & la

cheute de Iupiter. C'est aussi par la servile nature de ce Signe que servirent aux Romains nos Gaulles (comme nous verrons cy apres). Quand donc nostre Abside au du Monde 3600. où environ, fust avec la queue du Dragon de nature Saturnine & Martiale, alors s'esleuerent entre les Gaulois les mal-heureuses factions (dont parle Cesar en ses Commentaires) qui durant tout ce siecle, & encores en l'autre 3700, à cause de la premiere des trois estoilles qui sont en la queue d'Helice de Nature Martiale, esbranlerent de fonds en comble toutes les colonnes de leur Estat, & finalement par leur mal-heur firent planché à la puissance Romaine qui triompha d'eux & de leurs partialitez.

Auançons nous encore bien auant en ce Signe, aussi bien n'y cognoistrions nous de long-temps, qu'imbecillité, & extreme legereté, & pour les affaires des Gaulois des fougues & des bouttades. Hé? quel plaisir aurions nous à regratter les euenemēs des tristes influences du dos du Lyon, & de tant d'estoilles de l'Hydre que nous allons rencontrer. Il nous suffira de remarquer qu'en ce temps là, à cause de la Vierge (en laquelle couroit nostre Abside, qui est la maison de Mercure, qui influë & est auteur des lettres & disciplines,) Les Sciences furent en tres-grande estime entre les Gaulois, & que le Barde & le Druide les cultuerent avec tant de soing, qu'avec la grande inclination qu'il leur estoit donnée du Ciel, Je croiray facilement qu'ils surmonterent en icelles, toutes les nations du monde. Ils excellerent donc en ce tēps, c'est à dire, depuis 3700, ans, iusqu'à 5400, non seulement aux Sciences vulgaires & communes,

mais aussi aux secrets & abstruses, & qui ne se traittent qu'avec secret & ordre de Kabale, telles que la Philosophie naturelle & la vraye Astrologie, desquelles nous ne treuons maintenant dans les Auteurs imprimez, que des figures obscures, des Enigmes confus, en forme de labiryntes, & des images voilees, qui ne peuuent estre cogneus que par ceux qui par vn maistre (comme nous) y ont esté heureusement initiez. Or reuenons à nostre train.

En l'an du Monde 5500. où enuiron, nostre Abside estant infortuné par les Estoilles du Vengeur de la nature de Saturne & Venus (significateurs de l'Empire Romain, comme on lit en la Kabale Astrologique de Phauorinus, & Obseruations celestes de Iamblichus, Les Gaules perdirent leur premiere & ancienne liberté. Vierge encore & non jamais touchée, cedans non à la force & vaillance, Car par là ils eussent peu subiuguer plusieurs mondes: mais à la iuste volonté de DIEU, à laquelle obeissoit le Ciel & la Terre, & tout ce qui domine la Nature. Ils furent tributaires aux Romains iusqu'en l'an du Monde 5900, & du VERBE incarné 420, où enuiron; quel Abside venant à la fin de la Vierge, leur rendit la liberté par le rencontre heureux de la blonde Perruque & Couronne de la Reyne Berenices, par le Bout de lais de fenestre de la Vierge, & par le Cheual celeste, lesquelles constellations vnies, vnirent encore à la Gaule, le Sycambre, où Salien Franc, & en la personne de Pharamond, releuerent vne Royauté qui ne peut trouuer sa fin qu'avec la consommation de toutes choses. Symboles inexplicables, representa-

rions diuines, pourtraicts de nostre terrestre felicité, de quelles dignes parolles pourray je descrire le bien, que par la liberalité du Createur, vous respandez sur nous? C'est icy, (beaux esprits de la France, ames curieuses & dignes de sçauoir les secrets de DIEU,) c'est icy maintenant que vous deuez verser les triees fleurs de vostre bien dire, & remplir l'air de l'odeur de vos loüanges, chantans les admirables forces & proprieté de ces estincellantes & lumineuses constellations, par lesquelles comme par ses instrumens & causes secondes, le souuerain Roy de toutes choses, vous a redonné la liberté pour tousiours. Doncques valeureux François, engrauez sur l'airain des siecles, Faictes entrelasser parmy les timbrés & blasons de vos armes, faictes peindre sur l'asur de vos Escussons, les images de ces belles & desirables formes, qui pour vous sont dans les Cieux toutes couuertes de flammes, & embellies de rayons d'heureuse gloire. Mirez, admirez les souuant, & quand vous verrez que la flotante & blonde cheueleure de la Reyne Berenicé, signifioit qu'elle vous vniroit avec des Pharamonds & Clodions Cheuelus, Que l'Aisle de la Vierge vous esleueroit & dōneroit les airs, voire pour jamais les airs de la liberté. Que le Cheual celeste la soustiendroit & porteroit, communiquant sa valeur à vostre Cauallerie inuincible, qui en tout l'Vniuers est l'espouuante des armées, la terreur des bataillons, & la desconfiture des ennemis, admirez alors le iuste rapport de la Terre au Ciel, l'obeissance des choses inferieures, aux superieures, & la perfection de vostre Empire en ceste accomplie vnion. Mais sur tout confide-

rant que ceste Cheueleuré est encore la Couronne d'une belle Reyne, qui vous a alliez si fermement avec vos voisins les Sycambres, par laquelle liaison ont resté inébranlables par tant de siècles les perdurables fondemens de vostre Estat, sur tout souuenez vous alors des grands labeurs qu'à soustenu en son heureux gouvernement vostre REYNE REGENTE, mesmement pour vous allier avec vos voyfins d'une paix assurée & stable, & tenez pour enseignement Mystic & Kabalistique, que ceste Couronne celeste n'est que l'Image de la sienne, de tout temps mise & gardée au Ciel pour le bon-heur des François, par les sages Druydes pour telle demonstrée, que dorenavant nous pouuons nommer, non de la Reyne Berenice seulement, mais encore de la tres-prudente, tres-courageuse, & tres-liberale REYNE REGENTE MARIE DE MEDICIS.

Plus donc par la rencontre de ces belles & puissantes constellations, toutes descoulantes en rays & lumieres fortunées, que par la vertu du signe de la Vierge, dans lequel estoit encore l'Abside, les François affermirent leur naissante Royauté. Non toutefois de telle façon, que la nature contraire & imbecille de ce Signe, ne causast bien tost des grands desordres en l'Estat. Car l'an du Monde 6060. & du Salut 567, le bec du Corbeau, commune estoille, avec l'Hydre de la nature de Saturne & Mars, communiquant ses infâustes puissances à l'Abside, fist naistre plusieurs testes & Royautés entre les enfans du grand Clouis premier Roy Chrestien, dont Gildebert fust Roy de Paris, Clotaire de Soissons, Clodomire d'Orleans, & Thyerri

de Mets. Voire quelques annes escoulees sous Clotaire 2. esleuant vne nouvelle teste, mist toute la puissance de la Monarchie entre les mains des Maires du Palais, qui finalement quand l'Abside fauoyfina des yeux & du col du Corbeau de nature Saturnine & Martiale, an du Monde 6250, & du salut 750. se saisirent de la Royauté.

L'Abside sortant entierement de la Vierge, entra dans Libra, signe aussi Royal & Equinoctial, exaltation de Saturne & maison de Venus, dont la force & vertu dominante, s'estend proprement en signification d'Empires, gouvernement de grands Royaumes, & construction de grandes Citez. Signe non du tout propice & favorable aux François, mais toutefois plus semblable & sympatisant avec eux, que celui de la Vierge. Car c'estuy-cy est signifiant en choses hautes, grandes, & triomphantes, plain de pompe, d'esplendeur, & d'apparat auguste & magnifique. Voila pourquoy aussi dès l'an 800. du Salut, & du Monde 6300. l'entremise & proximité du Centaure, figure toute remplie d'estoilles Iouiales, meslees avec vn peu de Veneriennes, avec celles de l'aile droite du Corbeau de nature Saturnine, fust cause de redresser en France des reliques du miserable desbris de l'Empire Romain, vn autre Empire, lequel à raison de Saturne & Venus (significateurs comme a esté dit de l'Empire Romain) fust encore appelé de ce nom, bien qu'aucun Romain n'y commandast, & à cause des estoilles Iouiales (significatrices des François) fust establi en la personne de Charlemagne qui estoit leur Roy. Ptolomee, Leopold de Duc d'Austriche, & Cardan suiuaient

Hermes Trismegiste, parlant de la propriété des estoilles qui sont au commencement de Libra, enseignent, *Illas valere ad scientias, & ad leporem dicendi*. Ce fust la cause seconde du sçauoir de Charlemagne, & de l'establissement de ceste belle & jadis tant florissante Vniuersité de Paris, qui ne peut estre restablie que par vn Roy qui aye beaucoup de participation & de conuenance avec la dicte constellation, & telle l'a nostre Roy inuincible aujourd'huy heureusement Regnant : Car sa Majesté a Mercure en toutes ses dignitez & puissances essentielles, matutin, & encore Iupiter & le Soleil avec les susdictes estoilles du commencement de Libra, qui non seulement promettent de luy donner vne grande cognoissance en toutes Sciences, comme à Charlemagne, mais encore le faire appeler comme le grand Roy François, le Pere des Sciences & Disciplines.

Ne trouuons pas estrange que cest Empire escoule si tost de la personne & race des Roys de France, puis que c'est le propre du Centaure & Corbeau, de n'arrester gueres en vn lieu, & à la verité si c'est Empire n'eust esté continué par election, qui est comme vne espece de mouuement, allant de race en race, par là se rapportant en quelque façon à ses principes, il y auroit longtemps qu'il ne seroit plus, & si l'Aigle ne change de branche, elle aduance ses destinees. Parce que le commencement de Libra est fort entrelassé avec les estoilles Mercuriales des ailles de la Vierge, qui sont infiniment instables, imbecilles, mechaniques, debiles, & improporcionnees en ce qui est des grands & nouueaux Estats ; A ceste cause la
plus

plus part des deux siècles suivans, nous aurons au Sceptre & gouvernement des Princes imbecilles, & plustost plains d'affoiblissement que d'aucunes solides vertuz. Tels furent l'Empereur Regent & Roy de France Charles le-Gros, qui gouverna ce Royaume mercurialement seulement, & rien Iouialement, & puis mourut de miserable pauvreté en la chetive cahutte d'un Bourg sans nom. A celuy là suivit Charles le simple, lequel pour ces imperfections & impropotions, soixante quinze ans seulement apres Charlemagne, abandonna sa dolente vie en la destresse d'une triste prison. De mesme suite Loys le Faineant vint apres luy, qui fut le dernier Roy de ceste seconde race Royale. Mais ces imbecillitez Mercuriales, peuvent estre mieux iugees par ceux qui considereront comme j'ay faict, les Natiuitez de ces trois Roys infortunez, que descrites par aucun stil humain. La valeur de ce florissant Royaume se fletrissoit languissamment par la commixtion de ces estoilles Mercuriales & rencontre de Princes, qui auoient en leur Horoscope ennemis ou infortunez Jupiter & Mercure, quand l'Abside en l'an du Monde 6500. & du Salut 987. entrant dans la constellation de Bootes, autrement Arctophilax, où le gardien du grand Chariot print la propriété du talon du Centaure, qui est Iouiale & Venerienne, & encore celle de l'antecedente à l'aisle susdite du Corbeau de la nature de la dicte, par le moyen desquelles influences, comme vne terre seiche freschement arrosée d'une humeur conuenable, le Royaume reprit sa premiere vigueur & verdeur, en reproüignant les jettons de ses lauriers & Couronnes en la maison

de Hues le grand, qui nous seruira deormais d'une seconde pepiniere de grands Augustes, victorieux & tres-sages Roys. On ne verra point en ceste troisieme race, vne si grande estenduë de pays leur obeir, on n'y remarquera point des victoires si celebres & ordinaires, qu'en la premiere & seconde, mais aussi elle gardera le sien, & ne donnera point à lire dans ses Histoires, les mal-heureuses dissensions des fils contre les peres, des freres cōtre les freres, suiuiues tousiours d'estrange & piteux Catastrophe. Au contraire DIEU approuuant ceste iuste domination, confirmant la vertu des constellations aydantes à l'Abside, conseruera six cens ans & dauantage, ceste genereuse race au throsne de la France, à quoy les autres deux ensemble n'ont peu approcher ou paruenir.

En l'an du Monde 6600. & du Salut 1061. l'Abside prenant la vertu du pied droict du Corbeau, de nature Martiale & des estoilles qui sont au costé droict en la ceinture de la Vierge, qui sont Mercuriales, selon l'impatience de ceste influence trop viue, qui est tousiours cause des principales fougues & fautes des François, parce qu'il a desia assez de promptitude & legereté par la propriété du Cancer, qui est dominé en partie par la Lune tousiours mouuâte, sans que la viuacité remuante de Mercure le vienne aiguillonner. Par l'impetuosité donc de ces Asterismes s'esmeurent alors les cruelles guerres & inimitiez premieres des François, contre les Siciliens, puis contre les Flamans, puis contre les Anglois, lesquelles dernieres furent plus cruelles que toutes les precedées, pour auoir esté fomentees par l'autre pied du Corbeau de na-

ture Saturnine, & par les autres estoilles de la susdite Ceinture, de la nature jadicte. Car la France, apres auoir esté à cause de ladite ceinture, comme entouree d'ennemis, par les guerres qu'elle auoit eu contre tous ses voylins; finalement par guerre ciuile, se cuida destruire elle mesme, par le moyen de l'influence Mercuriale & Saturnine, qui aux brigues, pratriques, & artifices Mercuriaux des factions d'Orleans & de Bourgogne, adjousta des meurtres, & trahisons Saturnines, insignes, & incroyables. Et sans doute si ceste Monarchie eust peu finir, elle se fust perduë en l'an du Salut 1422. & du Monde 6900. ou enuiron: ou pour mieux parler, Si DIEU, (voulant demonstrier vne extreme benignité enuers elle) ne luy eust donné vn Roy, (c'est Charles 7.) sous des constellations tres-fortes Iouiales & Mercuriales, semblables à celles de la nature du Royaume, & quasi pareilles à celles du Roy HENRY le grand, en ce qui est de la conqueste & repos de la France, par le moyë desquelles se tempererēt peu à peu celles de l'Abside, qui finalement laisserent le dessus aux Iouiales & Mercuriales, comme on le voit en la Natiuité dudit Charles 7. qui se treuve dans les Commentaires de François Iunctin, Prestre Florentin, sur le Quadripartit de Ptolomée. Je n'attribuë point les guerres & voyages des François en la terre Sainte, au mouuement de nos Absides, Car elles descendoient des generales constellations de l'vniuersel Monde. Ainsi par la bonté du Maistre de toutes choses, qui s'est seruy de ces estoilles & de la prudence de Charles, comme des roües des ressorts de sa grande grace, la France reprint halaine

iufqu'aux guerres d'Italie, eftant gouuernée pendant ce temps-là, par Iupiter & Mercure conjoincts, *Partiliter & in eodem puncto Absidis*, fur le lieu de l'eftoille qui precede les Lombes du Centaure, qui eft Iouiale & Mercuriale, par laquelle conjoinction & vnion, Mercure qui selon nos reigles, fe conuertit tousiours en la nature de ceux qui luy font ioincts, perdit l'imbecillite de fa propriété, print la Iouiale propre à la France, & respandit fur elle fa trop subtile influence, qui avec la nature des Balances, nous a tant exercez en disputes & procez, en la poursuite desquels nous serons iufqu'au temps sus marqué.

Nous voicy maintenant en l'an 1494. du Salut, & du Monde 7060. nous voicy, disie, aux boutades, impetuositez, & fougues Françoises, qui esclattent par l'inambulation de l'Abside qui se treuve fur la 2. estoille des 4. qui font dans Libra, au long de l'Aisle fenestre de la Vierge, de nature Mercuriale. Icy l'espluchante poincte de ladiete influence, apres auoir faict pulluler parmy nous les cruelles & deuorantes Hydres des procez renaissans, nous fit rechercher les antiens droicts que nous auions en Italie, intenter nostre action, & en pourfuiure le jugement par le mortel arrest des armes. Mais cōme tous procez sont mal-heureux aux François seulement: (Car il les deuore.) La possession valut aux ennemis, & nous fusmes condamnēz en grandissimes despens, executez, & contraints par corps, en la personne du grand Roy François premier. Le mal-heur donc que nous ressentions en ce meschant procez, venoit de l'inconstance des affaires, ceste inconstance, de l'impuissance de ne retenir

le conquis, & ceste impuissance de la mutabilité & conuertibilité Mercuriale, qui (comme il est dit) trouuant aux François vne nature prompte, l'emporte inconsiderement & temerairement. Ceste malencontreuse constellation n'estoit passee, que l'Abside rencontra la fenestre espaule de Bootes, de nature Saturnine & Martiale, nullement Iouiale, (mais bié son ennemie,) influéce autant, voire plus cruelle que la precedente: Car la premiere n'infortunoit que pour ne retenir son bon-heur, ou prendre ses aduantages, & puis la guerre estoit contre des estrangers. Mais en ceste cy toute sa signification tomboit sur le Royaume, tout le desordre venoit d'iceluy, & tous les rauages s'exercoient en son cœur, en ses propres entrailles. La raison de celà estoit, que Iupiter maitre de l'Abside, *Nullam habebat in hac constellatione conuenientiam*, comme a esté dit, ainsi qu'il auoit tousiours eu aux precedentes Mercuriales, & que chacun de ces deux Planetes malins, vouloit estre dominateur. De faiét la malice de ceste effroyable espaule appelée Teginus, a esté si grande qu'elle a exercé les plus cruelles qualitez de ces deux Planetes. Le propre de Mars est d'agir ouuertement, & de iour, & alors tuer, & par fer, feu & flamme, ruiner, espandre le sang, & destruire tout. Saturne vient couuertement, par fraude, dol, tromperie, & de nuict, puis assomme, precipite, noye, estouffe, & estrangle; combien trop veritablement ont elles representé sur nostre triste eschafaut toutes ces lucteuses proprietéz? Mais dira quelqu'un, d'où sont venuës les disputes de la Religion, mellées avec les gibets & les feux parmi

ces forcenees diuisions? Le respons, que ie ne pense pas que les disputes de la Religion dependent du mouuement des Absides, quoy qu'en aye dict Cardan, & tant d'autres doctes, si ce n'est que ce changement icy, estant le plus horrible, espouuentable & formidable de tous les precedens, DIEU aye permis qu'il aye amené ces disputes pour excéder en l'ame & au corps, tous les maux qui furent jamais. Et à la verité, s'il est permis de croire, *sub censura Ecclesie*, qu'il permette aux Astres d'esmouuoir ces disputes, comme agissans premierement sur les corps, & puis par eux sur les ames, *Non simpliciter & directe, sed per medium, & indirecte*. I'aymeroie mieux croire qu'elles auroient esté suscitées par la constellation de la liee & emmanoree Cassiopee, qui en l'an 1572. enuiron la S. Barthelemy, monstra à tout l'Vniuers vne nouuelle estoille en sa Chaire, aupres de ses genoux, qui en grandeur surpassoit celles de la plus grande magnitude, esgale à celle qui apparut aux Roys qui vindrent d'Orient adorer le CHRIST, laquelle se monstra brillante & estincelante par seize mois où enuiron, s'escolant & disparoissant peu à peu, comme de mesme firent ces feux & ces gibets, & comme encore il semble que maintenant en la France peu à peu s'escole & s'esteigne ceste ardeur desmesurée de la Religion, qui alors enflammoit si passionnement les cœurs, & qu'elle aille encore iusqu'à son temps en son déclin, iusqu'à ce qu'il plaise à DIEU. Mais comment, par quelles demonstrations & raisons Astronomiques & Phisicales, on pourroit demonstret, comme l'estoille des genoux de l'enchaînée Cassiopee

nous designoit & figuroit celà? Je le pourray traiter ailleurs autrement, car ces raisons pourroient faire chopper icy quelque ame infirme.

Ces feux, rebellions, desobeissances, paix ou trêues, durerent iusqu'en l'an 1585. & du Mōde 7080. que l'Abside prenant les proprietéz de l'antepe-nultiesme de l'Hydre, qui est vers la fin du 6. degré des Balances, de nature Saturnine & Veneriene, fit naistre & soufleuer en la Ligue derniere vn nōbre de testes contre la Royale. Et parce que la nature de la precedente Saturnine auoit esté corroboree par ceste-cy, pour comble furent adjoustees aux guerres ciuiles, l'incursion de l'ennemy naturel, les garnisons dans la Capitale, les entreprises & prises de la Couronne qui fut fondue, & ses pierres precieuses comme mises à l'encan. Car quant aux morts violentes des chefs, Premièrement de Monsieur de Guise, & puis du Roy HENRY 3. ces estranges euenemens, ensemble le changement de la Couronne d'une branche en l'autre, & la mort de HENRY le grand, ne vindrent pas absoluëment, à cause de l'influence de l'Hydre, encore qu'elle y aydast, comme qui pousseroit vne chose esbranlee, mais aduindrent par les malignes constellations vniuerselles du Monde, qui troublerent pour lors la plus part des Roys de la Terre, ayans leurs effects au temps seullemēt des accidentaires directions des Planettes de leurs Natiuitez, qui sont mises en lumiere au Commentaire du Prestre Florentin, sus-allegué, dedié aux Inquisiteurs, & avec leur permission imprimé. La France ayant esté long-temps fort vexee par l'Hydre, finalement l'Abside vint au 6. degré, & 48.

min. de Libra, aux termes de Venus, dans lequel lieu, elle a plus de puissance qu'aucun autre Planete, & partant parce qu'elle est benefique & paisible, & qu'elle participoit à l'influence precedente, qui estoit en partie Venerienne, facilement estant augmentee de force par ces Termes, elle commença à nous dominer absoluëment, & selon sa nature, enclina à la paix les esprits du Roy, des François, & de l'estranger, à ce contraincts & forcez les deux derniers par les armes victorieuses & invincibles de sa Majesté, qui pour le recouurement de son Royaume estoit capable de battre toutes forces d'ennemis, voire toutes les forces du Monde ensemble, à cause des Triangles de Saturne à Venus, & de Jupiter à la partie de Fortune, par lesquels on peut lire, que DIEU vouloit indubitablement que sa Majesté recouvrast l'heritage de ses ayeulx par armes. D'autant que Mars en son Horoscope, auoit vne tres-grande commixtion, liaison & action avec Saturne & Venus, significateurs de son heritage. Car Mars estoit en la maison de Saturne, & au sextile de Saturne, & Venus en la maison de Mars, & sextile de Mars. D'abondant Mars estoit en sa propre exaltation & throsne, en la ligne du Septentrion qui monstroient le Royaume. Et non seulement estoit-il né pour vaincre, mais encore pour regner apres en paix, comme le montre Jupiter en sa Natiuité conjoint par Orbe aux Balances, avec le degré de l'Abside. Et à la verité les Termes seuls de Venus, n'eussent point donné vne paix si loëue, s'ils n'eussent esté soutenuz & fortifiez par ceste tres-forte, & pour ce disposée de DIEU constellation. Comme de mesme
apres

apres sa mort, les funestes feux de nos déplorables
 dissensions, eussent avec plus de ravage que jamais
 embrasé les mal-heureuses mutineries de nos
 guerres ciuiles inciuiles, si la mesme beneuolence
 du REDEMPTEVR, n'eust faict naistre sous mesme
 constellation le Roy LOYS 13. avec felicité regnant,
 ayant pour cest effect, non seulement Iupiter aux
 Balances conjoint avec le degré de l'Abside, & en
 la ligne du Septentrion qui demonstre le Royau-
 me, mais aussi Mercure tres-puissant en son Signe,
 & encore (quasi au mesme degré de l'Abside) le
 Soleil, hors des rayons duquel la Lune defluant &
 sortant en ce mesme Signe, prend & retient à soy
 les feux & flammes de Iupiter que le Soleil luy
 baille. Caracteres certes mystérieux, admirables,
 notables, & longuemét remarquables. Caracteres,
 disie, qui dès la naissance de sa Majesté, peignoier
 d'un bien visible crayon sa Royauté en bas âge, la
 REGENCE DE LA REYNE sa mere, le bon-heur du
 Regne & du gouuernement. Vous serez con-
 traints icy, ames opiniaftres, basses, & vulgaires,
 qui ne pouuez considerer pour la pesanteur de
 vos esprits, que la boüe de la terre, & la masse
 grossiere de ce qui s'arreste entre vos doigts; vous
 serez, disie, icy contraincts d'approuuer la verité
 de nos reigles, & confesser l'infalibilité de nos
 axiomes, (quand DIEV de sa toute-puissance n'en
 empesche la signification.) Voyez nos reigles en
 tous nos Autheurs, Chapitre des dignitez acciden-
 taires des Planetes, & vous verrez qu'un Planete
 est dict, estre sous les rayons du Soleil, quand il est
 trop pres d'iceluy, n'en estant pour le moins esloi-
 gné de sept degrez, alors ce planete comme vne

petite bougie mise deuant vn grand feu, perd sa clarté & sa force, la delaissant au Soleil, qui puis apres la communiqué au premier planete qui défluë, & sort hors de ses rayons. Considérez maintenant Iupiter significateur de la France, & de l'autorité du Diadème, estre en la Natiuité du Roy au 3. degré, & 5. min. des Balances, & le Soleil au 4. degré & 34. min. comme la Lune au 22. degré & 10. min. dudit Signe. Par la reigle donc, Iupiter se trouuoit priué de clarté, de lumiere & de force. Car il n'estoit esloigné du Soleil que d'un degré, & 29. min. & le Soleil l'ayant prise, la rendoit & deposoit à la Lune, qui n'estoit esloignée & défluante du Soleil, que par 17. degrez & 36. min. & partant n'auoit marché que deux degrez où environ, depuis sa sortie hors des rays du Soleil, qui ne s'estendent que iusqu'au quinziesme. La Lune par ces reigles, sortoit donc hors des rayons d'iceluy, les remportant remplie de clarté, de rays, de feu & vertu louiale. Voyez encore Ptolomee, liure 3. de son Quadri-partit, Schoner chap. 2. liure 1. des Natiuit. & tous nos maistres chap. des Parens, & vous verrez que la Lune represente tousiours la Mere aux natiuitez nocturnes, comme est ceste cy. La Lune donc, emportant & retenant la lumiere & clarté que le Soleil auoit osté à Iupiter significateur du Royaume, & d'ailleurs se trouuant hautement esleuée en l'Apogee de son Eccentrique, au Septentrion qui marque l'heritage & le Royaume du Roy, comme a esté dict, demonstroît clairemēt que la Reyne sa mere, exerceroit vn iour tout le pouuoir autorité & influence de Iupiter, & partant seroit Regente en ce Royaume heureuse,

obeie, redoutée & respectée. Qui voudroit maintenant considerer que signifient les quadrats de la Lune à l'ascendant, & à la partie de Fortune, ensemble les deux heureux sextiles dextres de Mars & Venuz à icelle Lune, qui applique & s'en va au corps de Saturne, celui-là verroit en gros le passé & le futeur, & loüeroit DIEU de la bonté de sa grace indicible. Reuenons à nos Absides.

Celle de la France; c'est à dire de Iupiter, estoit au 6. degré 57. min. & 9. secondes des Balances, quand l'infemale creature, entraînée par vne diabolique imagination, mist en effect les menaces de mort violente, que par quatre redoublées constellations le Ciel auoit démontré dès la Natiuité pouuoir choir sur le liberateur de la Frâce, sur l'incomparable HENRY le grand, de tres-heureuse & tres-douce memoire. Ma plume icy reste immobile, se representant seulement en gros les qualitez mal-heureuses, figurees par les Aneretas significateurs de ce satellite de l'horreur de l'affreux Auerne, & comme frapée du foudre, transist sous l'estonnement d'un si lugubre coup. Ce coup eust renuersé tous les fondemens de l'estat, & ouuert la bonde aux flots & vagues des tempestes passées, si nostre tres-heureux Roy regnant, n'eust eu en sa Natiuité, comme i'ay desia notté, Iupiter cōjoinct avec le degré de l'Abside. Je l'appelle tres-heureux. Car il ne peut mourir d'aucune mort violente, n'ayant en son Horoscope, aucune constellation qui l'en menace. Roy doué d'un esprit admirable, d'un jugement singulier, d'un courage & ame genereuse & Royale, auquel plaise à DIEU donner les ans de Nestor, comme il a desia ses

guerrieres vertuz. Donc sa Majesté à Iupiter con-
 ioinct avec le degré de l'Abside. C'est aussi, apres
 DIEU, l'une des causes de nostre repos, de nostre
 bon-heur, & de la conseruation de ce Royaume.
 C'est ce qui a retenu les armes des estrangers &
 subjects effarouchez par le tres-scelerat assassin du
 Roy HENRY le grand, c'est ce qui a faict fleschir les
 mutins aux pieds de son throsne redoutable, c'est
 ce qui les gouuerne encore avec felicité, & qui les
 chastiera, s'ils entendent à la desbauche. En l'an de
 Salut 1614. & du Monde 7123. l'Abside est paruenue
 au 7. degré des Balances, rencôtrant la derniere de
 l'Hydre de la nature ja dite. Toute la France à veu
 comme elle a cuidé pulluler, toutefois, à cause des
 termes de Venus, dans lesquels l'Abside sera enco-
 re longues annees, & qu'on a obserué l'inuiolable
 ordre de l'Estat, qui nous sera pour tousiours, ce
 que les anciens estimoient leur estre leurs Lares &
 Penates Tutelaires, l'orage s'est calmé, si que sous
 le doux abry du port nous respirons aujourd'huy
 le ioyeux air d'une paix asseuree. L'an suiuant
 du Monde 7124. & du Salut 1615. l'Abside paruiē-
 dra au 7. degré. 2. 0. minutes. 57. secondes. & 16.
 tierces des Balances, retenant encore la propriété
 de ladicte derniere de l'Hydre: Car l'Abside n'en
 rencontre point encore d'autre. Cela nous signi-
 fie, avec ce que la Venus de sa Majesté est ceste an-
 nee la en l'Ascendant de sa reuolution, qu'un nou-
 uveau chef, ou plustost qu'une nouvelle estoille,
 plus belle, & radiant, plus fauorablement que cel-
 le de l'Aube du iour, viendra resprendre sur nostre
 Horison les benignes lumieres de sa beauté desira-
 ble, & ayant part, authorité, honneur, & titre très-

magnifique en l'Estat, incitera nos ames à ioye & delectation, selon le bon-heur de sa venuë tant esperee, remplissant l'ame de sa Majesté de tant de douceurs d'Amour, de delices & chers blandices, que ceste annee sera l'une des plus heureuses, plus agreables, & plaine d'autant de ioye, de ieux, sumtuositez, magnificenees & contentement qu'autre que sa Majesté puisse voir, encor que *Aliquādo obscuretur*. Car la nature del'Hydre, agira principalement en 1616. quand l'Abside rencontrera l'aisle fenestre antecedente du Corbeau de la nat. de Saturne & Mars, de la 3. magnitude, *Hic annus multa mirè dabit, Cassiopeiæque lites meditat, atque funera multa, quæ Deus Harpocrates non palam pandit.*

Nous ne chommerons plus si long temps aux autres trois mouuemens: aussi ils ne regardent que le general de l'Vniuers, qui ne nous touche pas tant que nostre particulier, & partant n'est pas besoin de l'esplucher si exactement. Nous disons que les desordres, vicissitudes, & reuolutions du Monde se jugent, entre autres considerations, par celle-là de la mutation de l'Eccentricité du Soleil, qui est suiue tousiours & perpetuellement non seulement par celle de Venus & Mercure, mais aussi par toutes les autres errantes superieures. Aussi est-il le Roy des Planetes, le Cœur du Ciel, la reigle des mouuemens, l'ame des corps celestes, la mesure du temps & des saisons, & la fontaine de la vie, de la lumiere & clarté. Voyla donc vn mouuement tres-notable, puis que le moteur a si grand pouuoir. Or ceste mutation de l'Eccentricité du Soleil, comme il est remarqué par Copernicus en son 3.

liure des reuolutions, chap. 20. & par Nostradamus
 au commencement de son liure du changement
 des Orbes celestes, se mesure & cognoist par le
 mouuement du petit cercle qui tourne le centre
 de l'Eccentric du Soleil, lequel petit cercle parfait,
 le tour de sa circonference en 3434. annees. La
 plus grande Eccentricité dernière du Soleil fust
 63. ans auant la Natiuité de nostre Seigneur & Re-
 dempteur IESVS - CHRIST, au temps ou enuiron
 que Cesar changeoit la Republique Romaine, &
 par consequent la plus grande part du monde en
 Monarchie. Et maintenant ce petit cercle aura
 sa plus petite Eccentricité l'an 1653. au mois de
 Mars, qui menace de ruiner tout ce qui auoit esté
 formé par la grande Eccentricité, & s'est maintenu
 en quelque façon iusqu'icy. Ce petit cercle est ap-
 pelé par le docte Cardan en son suplement des
 Ephemerides, & par George Ioachim Rethique,
 en sa premiere narration des Hypotheses de Co-
 pernic, la Rouë de fortune, parce que par son con-
 tour en partie, les Monarchies ont eu commence-
 ment & fin. Et defaict l'Empire Romain ayant
 esleué les trophées de ses plus glorieuses armes en
 la plus grãde Eccentricité, est depuis allé tousiours
 en descroissant comme descroissoit icelle: de sorte
 qu'aujourd'huy que l'Eccentricité est desia tres-
 petite, il semble estre tout caduc, vieux, chancelant
 & allant à son premier lieu. Au contraire de la loy
 & Empire Mahometan, qui ayant commencé au
 premier quadrat dextre de l'Empire Romain, a
 creu selon le mouuement du petit cercle, & declin
 dudit Empire, & croistra, si DIEU par nos prieres
 n'oste la propriété à ces mouuemens, encore beau-

coup plus en l'an 1653. Car en ce temps-là, sera la plus petite Eccentricité, apres laquelle en l'autre quadrat, ira derechef en ruine, & finira du tout finalement.

La mutation de l'obliquité du Zodiaque, ayde aussi fort à la cognoissance de ces formidables changemens, laquelle est tres-grande à 23. degrez, & 52. min. & tres petite à 25. degrez & 28. min. Et parce que ceste cause dépend de la precedente, de la mutation de l'Eccentricité du Soleil, Car ceste obliquité du Zodiaque, croist, ou se diminuë, avec l'accroissance ou descroissance de ladicte Eccentricité, qu'elle suit tousiours, par ces raisons sans l'exagerer dauantage, nous dirons seulement, que l'obliquité du Zodiaque descroist fort, & qu'elle sera en 1653. tres-petite, laquelle menace de donner vn nouveau Ciel, vne nouuelle terre, & de punir rigoureusement nos mal-heureuses iniquitez.

La conionction aussi des plus hautes & superieures Planetes, Saturne & Iupiter, est tousiours fort considerable; par ce que c'est vn assemblage de feux & flammes bien diuers, & que l'vn est appelé l'infortune, & l'autre la fortune grande du Monde. Ces Planetes ont trois sortes de conionction, petites, moyennes & grandes. Les petites se font en l'espace de 19. ans, 318. 12. h. & 59. min. Elles sont ainsi dictes, quand ces Planetes se rencontrent en ceste espace de temps, en signe de mesme trigone & triplicité qu'estoit celui de la precedente conionction. Et ceste-cy se faict dix fois auant que de sortir d'une triplicité. Nous n'entendons point parler de ceste-cy, puis qu'elle ne cause jamais des mouuemens guieres grands. N'y aussi de la moyen-

ne, qui est dicté quand ces Planetes se conioignēt en Signes, qui sont bien de diuers Trigones, mais non pas toutēfois contraires & ennemis, comme quand la conionction vient de la triplicité ignee, à la terrestre. Ceste-cy ne se faict que de 199. ans. 265. iours, & 9. heures, en autant de temps, & auāt qu'entrer en triplicité contraire, se faict trois fois. Toutefois celleicy aydee du mouuement des Absides, a faict la plus part des Empires. Celuy des Perses commença sous vne conionction moyēne, terrestre, & mouuement de l'Abside & influāces de Saturne & Mars. Celuy d'Alexandre le grand, sous vne moyenne Aeriene, & mouuemēt de l'Abside & influences du Soleil & Venus. Et celui de Mahomet en la moyenne aquatique & mouuement de l'Abside de Mars, & commixtions de Saturne. Ceste - cy faict merueille quand ce qu'elle a construit, ne se treuve ruiné par les generales & plus fortes constellations, au temps de la conionction subsequente. C'est pourquoy es siecles derniers l'Empire de Mahomet s'est accru des Empires de Trebisonde & Constantinople: Car la conionction moyenne de ces Planetes, se trouuoit au Scorpion, Signe de la Triplicité aquatique, conforme en vertu & qualitez au Signe, sous lequel il auoit commencé, auquel temps il n'estoit destruit par les generalles. Nous desirons qu'on considere sur tout les grandes, qui comme elles se font plus rarement: car ne se font qu'une fois en 794. ans & demy, aussi ont des effects plus merueilleux & extraordinaires. Celle-cy racle ruine, emporte, destruit avec vne violence du tout ennemie, tout ce que la precedente a faict. Celle-cy
rauage

rauage avec toute sorte d'hostilitez, non les villes & prouinces seulement, mais encore les Royaux, les Empires, & quelquefois tout l'Vniuers. La raison se peut facilement voir en la contrariété des qualitez des Signes, dans lesquels les conionctiōs ont esté faictes. Or les grandes conionctiōs se font quand des Trigones aquatiques, par exemple ces Planetes se conioignent en signes de Trigones Ignees. Ce changement faict tousiours les plus grands changemens.

Pour preuue regardons dans les Histoires, chers y ceux qui ont esté les plus generaux, & nous verrons si nous supputons aussi les mouuements celestes, qu'au mesme temps y auoit vne grande conionctiō. Sept cens nonante quatre ans ou enuiron, apres que DIEU ent formé ce beau chef d'œuvre le monde, y eust conionctiō, au temps de l'arred: alors la plus part du genre humain commença de mener vne vie ciuile, s'vnissant plus estroitement les vns les autres en forme de bourgs & citez changement bien notable, puisque dorefnauant chacun dira, tien, mien. La 2. se fist l'an du monde, 1588. à l'endroit de l'Asterisme de la nef celeste, laquelle à esté plus cruelle qu'aucune des autres, les effects apparurent 68. ans apres, non seulement en queleque parries de la terre, mais par tout l'vniuersel monde, quand le general deluge, submergea toute creature sauf ce qui, par la benediction diuine, fust sauué en l'arche avec Noé. La 3. fust l'an 2382. quand le genre humain se recueillit derechef en vng, bastissant villes & citez. La 4. fut l'an 3176. quand Nembrod dressa le premier Royaume, alors fust bastie la tour de Babel, & ad-

uint la confusion des langues, & les diuers langaiges qui depuis se sont espendus par tout, & ont tousiours changé suiuant les conionctiōs. La 5. fut l'an 3970. quand Moyse par la vertu de DIEU, emmena hors d'Egypte le peuple d'Israël, destruisant trente vng Roy, les Egyptiens, Hethiens, Amortheens, Chananeens, Pheresiens, Heuiens, & Iebusiens, & tous les peuples ou ils passerent sans esparagner aucun sexe. La 6. aduint l'an 4764 qui destruisit tout ce qui auoit esté fait par la precedente, par fer, feu & flamme ruinant le peuple d'Israël, qui en auoit tant d'autres ruiné, premieremēt par Teglath-Phulassar Roy des Assiriens, puis par son successeur Salmanassar, qui emmena le reste avec Daniel en la captiuité Babilonique, alors furent instituez les jeux Olympiques & Rome bastie. La septiesme se fist l'an 5558. du monde, la 15. du VERBE incarné, alors les Cefars reduirent la Republique Romaine en Monarchie, & puis peu à peu fust preschee & produite la LOY CHRESTIENE qui abolit la Payene. La 8. se fist l'an du monde 6352. & du salut 809. auquel temps la plus part de l'Europe, Asie & Affrique ayant esté destruite par des natiōs incogneues, Huns, Alans, Herules, Gepides, Gots Ostrogots, Vissigots, Lombards, Normans & Sarrafins, finalement l'Empire Occidental qui auoit esté aboly fust restauré & renouvelé en France par les armes de Charlemagne. La 9. & derniere conionction à esté faite, selō le susdit calcul des Grecs & Orientaux, l'an du monde 7111. & de nostre Redemption 1603. le 24. Decembre sur les 7. heur 28. min. 50. second. apres midy au pole de 45. au 9. degré 37. minutes, & 40. secondes du signe Sagittai-

re qui est ignee, aupres des genoux d'Ophiuchius, sur la premiere spondile & pied du Scorpion qui sont destresuiolentes constellations de la nature de Saturne & Mars, avec la participation de la teste d'Hercules apellee Rasalgeti de la nature de Mercure & Mars, qui adioust à la signification de la force, larcin & rapine. Ces constellations, parce qu'on vieillit dans les fondrieres du vice, & vid de la malice de l'iniquite, sont à tour l'Vniuers, principalement à vn Empire & quelques Royumes subiets au Sagitaire, en signes, marques demonstrations, figures & aduertissemens tres certains, de si horribles desolations, destructions & deuastations, que la menace de ces fleaux estât demonstree au Ciel avec excès & sans borne, sans doute, si l'on n'appaise Dieu, ils surpasseront tous ceux que les plus malheureuses nations ont iamais essayé. Et quand à nous François craignons DIEU, honorons le Roy, la Reine, Monsieur, Messieurs les Princes du sang, Superieurs & Magistrats, prians sans cesse pour eux, principalement pour la longue vie de nostre Roy tres-Chrestien tres-heureux & tres-inuincible: car il nous fera comme le Palladium aux Troyens, comme aux Romains les boucliers Anciles, & comme l'image d'or de la fortune aux valeureux Cefars.

FIN.

Handwritten text in a cursive script, likely from a 17th or 18th-century manuscript. The text is arranged in approximately 20 lines, with some lines being more densely written than others. The ink is dark, and the paper shows signs of aging and discoloration. The handwriting is somewhat slanted and fluid, characteristic of the period.

1667

